



UNIVERSITÄTS-
BIBLIOTHEK
PADERBORN

**Jus Canonicvm R.P. Pavli Laymanni, Soc: Jesu Theologi, Et
Olim In Alma Et Episcopali Academia Dilingana SS.
Canonum Ordinarii Professoris**

Laymann, Paul

Dilingæ, 1666

Capitvlvm XVIII. Quamquam.

[urn:nbn:de:hbz:466:1-62559](https://nbn-resolving.org/urn:nbn:de:hbz:466:1-62559)

CAPITVLVM XVIII.

Quamquam.

SUMMARIUM.

1. *In Cathedralibus ecclesiis Canonicis iure eligendi priuatis ius eligendi deuoluitur ad Papam, præterquam in casu negligentia, intra tres menses ad electionem non procedentis.*
In inferioribus ecclesiis deuoluitur ad proximum Superiorem.
2. *Canon correctorius iuris antiqui non est extendendus ultra casum expressum.*

Discrimen est, quoad ius deuolutionis inter ecclesias Cathedralis, & alias inferiores, siue regulares sint, siue seculares, quod in his, si Capitulum quacumque ex causa eligendi facultate priuatum sit, eligendi potestas ad proximum Superiorem deuoluatur. At uero in Cathedralibus distingui debet, utrum priuatio accidat propter eligendi negligentiam, siue si Canonici Cathedralis intra tres menses eligere intermittant, tum electio deuoluitur ad proximum Superiorem eius ecclesie, uidel. ad Metropolitanum: sin autem ob aliam causam eligendi potestate priuati sint, ut quia indignum elegerunt, vel formam electionis vitiarunt, tum deuolutio fit ad Papam. Ita hæc respondit Bonifacius VIII. Pontifex.

Pro maiore intellectu aduertit hæc Gl. ver. deuoluetur; Secundum antiquum ecclesie morem prouisionem Episcoporum, & Archiepiscoporum spectare ad Sum. Pontificem, ut colligitur ex c. i. d. 22. c. porro. 4. c. Salnitana 24. d. 63. c. pastoralis 7. q. 1. Inferiorum autem ecclesiarum Prælatos, nisi specialiter exempti sint, ab Episcopis institui: Ita tamen, ut secundum eosdem sacros canones, electio Prælati ad cuiusque ecclesie Collegium, seu Capitulum spectet, ut dixi in c. r. extra hoc tit. Quare mirum non est, si Capitularibus ob quamcunque causam eligendi iure priuatis institutio Prælati ad eum

Superiorem deuoluatur, ad quem de iure confirmatio eius pertinet; uidel. Si Cathedralis ecclesie Canonici priuati sint, ad Sum. Pontificem; Sin uero Capitulares inferioris non exemptæ ecclesie priuentur, deuolutio fiat ad Episcopum. Et ita absque discrimine obseruatum fuit etiam tempore Innoc. III. qui in c. dilectus 12. de concess. præbendæ, respondit, irritam esse prouisionem Episcopi, quam Metropolitanus attentauit, quasi ad ipsum propter negligentiam Capitularium potestas deuoluta sit, cum talis deuolutio ab ecclesia Cathedrali ad sedem Apostolicam fiat.

Verum postea in Concilio Lateranensi sub eodem Innoc. can. 23. quod est, c. ne pro defectu, 41. extra hoc tit. concessum fuit, ut etiam à Cathedralibus ecclesiis ad Metropolitanum deuolutio fiat ob negligentiam Capituli intra tres menses ad electionem non procedentis. At uero in alijs casibus Capituli priuati seruari debet ius antiquum, ut non ad Metropolitanum, sed itatim ad Papam ius eligendi deuoluatur. Et hæc est mens illius Constitutionis *quamquam*. Circa textum huius c. duo notanda occurrunt:

I. Quod canon correctorius iuris antiqui non est extendendus ultra casum expressum, uti etiam habetur l. præcipimus, in fine C. de appellat. Nam in cit. c. ne pro defectu, contra ius antiquum fuit constitutum, ut in casu negligentie etiam in Cathedralibus ecclesiis deuolutio fieret ad immediatum Superiorem, uidel. Metropolitanum: Id uero extendendum non esse ad casus alios priuationis respondit hæc Bonifacius VIII.

II. Si electores indignum eligant, ipso iure priuati sunt ea vice, atque ius eligendi ad alios è Capitulo, qui electioni non consenserunt, deuoluitur: Sin autem formam electionis non obseruent, per sententiam Superioris priuandi sunt. Quare cum electio in hoc casu irrita non sit, possunt electores, atque per sententiam priuentur, ad aliam canonicam electionem accedere.